

February
2017



KRISTIAN THALAI



Vol. VII No. 12

Kristian Thalai Pawl Chanchinbu thla tin chhuak



Hliappui Branch Diamond Jubilee 6-8.1. 2017



LIKBK Kristian halai Pawl Inkhawmpui - December 1-5, 2016



Hmunthar Branch KP Silver Jubilee December - 16, 2016

Kristian Ṭhalai Pawl chanchinbu thla tin chhuak**1970-a chhuah ṭan ■ Kum 47-naa wawi 2-na ■ Chhuah tawh zat : 459****Editor :**

Lalchhuanliana

Joint Editors :

Lalhnehzova

Lalfamkimi

Lalmuanawma

Dr. David C. Vanlalfakawma

Manager :

Lalmuanpuia

A lak man :

Kum khatah - Rs. 80.00

Copy khat - Rs. 7.00

*Thu chhuah tūr nei chuan Editor,
Kristian Ṭhalai, Synod Office-ah thawn
tūr a ni a; a la duh chuan KṬP Office-ah a
man pèk lâwk a ngai.*

Office Phone : 9436142398**E-Mail :**kristianthalai1970@gmail.comcentralktp@gmail.com**KRISTIAN ṬHALAI PAWL****Thupui**

Rawngbawl tūra chhandam

Thupui inngahna

Ephesi 2:10. Thil ṭha ti atán
Krista Isuaah chuan siama awmin,
ama kutchhuak kan ni si a, chu thil
ṭha tih chu kan awmna tūrin
Pathianin a buatsaih lâwk a ni.

Thiltumte

1. Isua Krista rinna leh amah anna
kawnga ṭhalaite hruai.
2. Kohhran kut ke ni tura ṭhalaite
buatsaih.
3. Kohhran hnathawh tihpuitlin.
4. Krista Chanchin Ṭha puan
darh.

A CHHUNGA THU AWM

1. Editorial	2
2. Hun tharin nun thar a phut	3
3. Ka duh lai...“Mangtha” ka ti phal lo che...	7
4. He kum thar hi i tam malsawmna ni rawh se	11
5. Davida – ‘si’ sawm leh panga kai	14
6. KṬP Rorel Inkhawm programme	18
7. Lal Isua hi kan ta a ni	21
8. Work Camp report : <i>Khulichera</i>	23
9. Hriselna : <i>Antibiotics</i>	25
10. Kantu - Lunglei Bazar Veng Branch	29
11. Keimahni	31



KTP-ten rawng kan batwl hona a pawimawh tak mai inunauna, inlungualna leh inthlawp tawwna hi tun kum thar 2017 bul kan fan mek lai hian i ngai pawimawh thar leh zual ang u. He thil pawimawh tak tel lo chuan kan rawngbatwl na hian hma a sawn thei lo mai ni lo in, a chhiat phahin, kan rawngbatwl na hlu leh pawimawh tak hian awmzia a nei lo thei a ni.

Thuthlung Hlui kan en chuan Mosia unau Arona chu Puthiam hna thawok hmasa ber a ni a. Bible Commentary hrang hrang chuan Puithiam hna thawoktur hian Arona hi a mah puitu, puithiam dangten hriak an thih hma chuan puithiam angin Pathian hmaah a inlan ngai lo. Puithiam hna a thawh dawon hian a puithiam pui ten hriak rimtui (Olive oil) a luah an thih thin a ni tiin an sawi hlawm a ni. Chu ngei chu Sam ziak tuin, "Lua hriak hlu tak, khabe hmula lunga thla, Arona khabe hmul ngeia luang thla..." a tih kha a ni. Hei hian inlungualna, inpawm tawwna, inunauna a entir a ni. Chutah chauh chuan a ni Lalpan malsawmna thu a pek ni. Tin, Thuthlung Tharah pawh kan hmuh chu tunlai tawngin han sawi ta i la, rawngbatwltu team hnih Baptistu Johana team leh Lal Isua team an awm a ni. Anni team hnih hi an lar dunin a hun lai chuan mipui pawm an batwm nasa hle a ni tih Bible-ah kan hmu a ni. Baptistu Johana leh a thuihruaiten Simna Baptisma chantira rawng an batwl lain, team dang Lal Isua team an lo lang ve thung a. Anni hian thiltitheihna nen, tihdamna nen rawng an rawn batwl ve thung a. Heng team hnihte hi inelrel leh inngeih lo takin lo awm ta pawh ni se mihring lam atang chuan a mawh lo ve. A hun lai khan an lar dun si a, pawl pawl tih pawh awl tak tur a ni. Amaherawhchu, team leader Baptistu Johana chuan team dang leader Lal Isua chung chang sawiin "Lalpa lamlian sial ula, a kawngte tingil rawh u...A pheikhawok hrui phel tlak pawh ka ni lo ve..." a ti a ni. Chutih mek lain team dang leader Lal Isua ngei pawh chuan leader dang Baptistu Johana hnenah inngaitlawm takin Jordan luah baptisma a chang ve bawk a ni. Hei hian heng rawngbatwltu pahnihte inlungualna leh inthlawp tawwna a entir Chiang hle a ni.

Khing thil pahnih atang khian keini KTP-te hian zirtur kan ngah hle awm e. Rawngbatwltuten kan rawngbatwlpuite laka kan rilru put dan tur leh kan thawh hopui dan tur zir nan hmang ila a tha hle ang. Chutianga kan inzir theih nan chuan kan rawngbaw chhan kan hriat chian a tul hle awm e. Mahni hamthat nan leh hmakhua atana rawngbaw kan ni lo tih hre Chiang ila. Kan rawngbaw chhan ber Lal Isua a ni a, chutianga bawkin kan thian, kan rawngbatwlpuite hian an rawngbaw chhan chu Lal Isua a ni tih hre Chiang bawk ila; chutichuan, inngirrhona tur emaw, inelrelna chhan tur emaw eng mah a awm lo a ni. Chutih ahnekin, lungual takin, inpumkhatin rawng kan baw tlang ang a, kan thian, rawngbawlna hlawhtling tak leh nung taka neite kan lawmpuiin kan induhsak tawm thei ang a. Chutianga rawngbawlna chauh chuan rah tha leh rawngbawlna hlawhtling a hring chhuak thei dawm a ni. Chuwangin, rawng kan batwl na kawngah hian inunauna, inpumkhatna, induhsak tawwna, inthlawp tawwna, inngaihhlut tlawwna i uar deuh deuh ang u.

– Lalfamkimi

HUN THARIN NUN THAR A PHUT

— Rev. Vanlalzuata
Chawlhmun

Kumthar (2017) kan lo chuang kai leh ta hlawl mai. Kum thar hmu phak lovin mi tam takten khawvel an chhuahtan tawh a. Kum thar hmel hmutute zingah ngei pawh hian mi chi hrang hrang kan tam hle. Mi thenkhatte chu natna tuara rum vawng vawng te, thenkhatte chu zu leh drugs nena inchhawp te, Pathian hnena lawmthu sawi mawlh mawlh te, kum hlui aia suahtual rawngbawl nana hman tum mekte kan ni nuai a. Eng ang mi pawh ni ila, he kumthar hian thinlung thar leh nun thar min bat nasatzia hi kan hriat fuh chuan kan dam chhan kan tihlawhtling dawn a ni.

1. **Hun hman that pawimawhzia**: Ziaktu pakhat chuan, “I naupan laiin, ‘Kan la ngai dawn asin maw khuareiah,’ tiin zai la. I

vanglaiin, ‘Len lai kan chen ve e,’ tiin zai la. Kum 55 vel i nihin, ‘Hetah mikhual chauh ka ni, van khi ka in a ni,’ tiin zai la. Kum 65 vel i nihin, ‘Khita hming an lam hun chuanin ka awm ang,’ tiin zai la. Kum 80 chung lam i nih hunah, ‘Lalpa ka lo hawng,’ tiin zai rawh,” a ti a. Pathianin duhsak takin hun thar min pe a, keini hun hmangtute hian kan hun hlu takte hi awmze nei lova kan hman liam mai mai chuan chatuanin kan la inchhir ngei dawn a ni. Lord Chesterfield-a chuan, “Zingah darkar khat i hloh chuan nilengin i zawng hmu zo tawh lo vang,” a ti a.

Vawikhat chu mi rethei deuh mai, kawr hak tur nei lo hnenah hian mi hausa tak pakhatin kawr thar a pe a. Mi rethei chuan lawm takin a la a, a pawtchhe nghal a, a bula ek hruk nan a hmangtute zui ta mai a. Chu mi rethei chu kan

thiam loh viau laiin keini ngei pawh hi amah ang chu kan ni ve thin. Pathianin kan mamawh em em hun thar min pe a. Lawm takin kan la a, suahsual rawngbawl nan te, duham nan te, mahni hmasial nante kan hmang zui a. Pathianin duhsak taka hun thar min pek chu kan la a, kan pawthler a, ek hruk nan kan hmang ve tihna a ni ang. "Hei erawh min chhang teh, i hun i hmang tha em," ? tih hla kan sa thin a, a satute nun hi engtin nge a nghawng?

2. Hun hman that loh pawizia
: Mi pakhat chuan, "Hun kal tate khan min lo bum a, churangin hun awm mekte hian min tihrehawm ta a, hun lo la kal zel tur chu ka huphurh tak zet a ni," a ti a. he pa hi hunin a bum awzawng lo va, a hun hlute chu a hmang tha peih lo va, a chi tuh rah a seng ta a, a mangang leh si a, hunin min bum, a ti ta mai a ni zawk. A dik tak chuan amah zawkin hun chu bum a tum a, a bum theih loh avangin amah bumtuah a puh let hlauh a ni.

Hun hi a hmang tha peih lotute tan chuan nunrawng tak a ni a, mualphona te, zahna te thlentu a ni a, a tawpah a hmang tha peih lotu chu hremhmunah a inngaihtuah harh thin a ni.

Inchhir kan tihte pawh hi eng dang vang a ni lo va, hun kan hman that peih loh rah a ni. Hun hmang tha peih lohote chuan, "Ka lo ti ve ta lova aw," kan ti vawng vawng a, hun hmang thate chuan inchhir an nei ve ngai lo. Taulte vanglaia thatche tak pakhat pawh hi a lovaha a feh a. A thlam atangin, "Khu lai khu naktukah ka thlo vang a, saw lai saw a tuk lehah, khi lai khi a tuk lehah. Ekhai, wawiin thlawh tur ka nei lo a nih hi," tiin a hawng leh daih thin a. Buh seng a lo hun chuan seng tur a nei ve ta lo va, rilama thih a hmabak ta a ni an ti a. Hun hmang tha lotute chuan, "Hun ral ta zawng zawngte kha aw, koh kir leh theih ni sela, ko kirin Chhandamtu hnenah lawm takin ka pe tawh ang," ti chungin mittui nen hremhmun an her liam thin a ni.

3. Hun hmang ṭha leh ṭha lote

chanvo : Hun hi a hmang ṭha lotute tan chuan mi nunrawng ber, min tihrehawm tura lo kal a ni a. A hmang ṭhatute tan erawh chuan mi ngilnei leh mi dawhthei ber, hlimna leh lawmna kenga kan hnena lo kal chu a ni thung. Hman ṭhat loh avanga lungngai mekte chuan hun hi kan khing let a, kan do va, kan hneh si lo va. A hmang ṭhatute erawh chuan hun hi an fak a, an lo lawm hiam hiam a, a hnen aṭangin nun thar an dawng mawlh mawlh ṭhin a ni. Chuvangin Ralp Waldo Emerson-a pawhin, “Chatuan hlimna i duh chuan, second tinte hi hmang ṭha rawh,” (If you want to become a man of the eternal, let become first a man of the second) tiin a sawi a ni.

Hun hmang ṭhate chuan hun lawmawm lo thleng tur an nghak vung vung ngai lo va, tuna lo thleng mek chu an hmang mawlh mawlh a. Tun hun an hman ṭhat chuan nakin hun lo thleng tur pawh

a tithar a. Hun awm mek hmang ṭha peih lotute tan chuan hun thar rawn inher chhuak tur a awm ve lo. Kumthar kan tihte pawh hi a hmang ṭha peih lotute tan chuan kum hlui aiin a hlui zawk mah a, a hmang ṭhatute tan chuan tun zel hi a thar sur ṭhin a ni. Chuvangin Fred Beck-a pawhin, “Hun hmang ṭha peih lotu chuan amah a intihlum a ni,” (He who kills time commit suicide) a ti tawp mai a ni. Tuna tih tur tih loh chu nakinah, “Ka lo ti ta lo chu aw,” tia lungngaihna thlentu a ni dawn a, “Han piang ṭha leh ila chu aw,” tiin hnuk a chat zui ṭhin a ni. Hremhmunah khian an dam laia hun hmang ṭha peih loten min nghak a; vanramah khian an dam laia hun hmang ṭhaten min nghak thung a. Khawii zawkah nge kan kal dawn tih chu hun kan hman dan hian a hril a ni.

4. Hun hlu ber Lal Isua tan :

Fred Beck-a bawkin, “Pathian hian kan hun awl a duh lo va, kan hun hlu ber a duh a ni,” (The Lord wants our precious

time, not our spare time) a ti a. Mi tam takte chuan hun min petu Pathian tan hian kan hun awl awm chhun chauh kan hmang phal a; chu pawh chu mi thenkhatte chuan kan hmang phal lo va. kan hun neih zawng zawng Pathian tana hmang phal reng reng lo pawh kan kat nawk mai. Chutiang mite chuan Pathian biak inkhawm an hman lo va, an tawngt'ai hman lo va, Bible an chhiar hman hek lo. Hun petu Pathian aia biak tur t'ul dang an nei tam em em a, Pathian be hman si lovin an duham hman a, nawmchennaah chuan an kal hman hle si a ni. Chutiang mite chuan Pathian pawl kan khawih a ni tih hi kan hre lo va, kan thaw chauh an en laih laih hunah erawh chuan kan hre chiang hle ang a, Pathian tan kan inhmang thei tawh si lo vang.

Pathian tana kan hun pe phal lotute hi i inngaihtuah chiang ang u. Hun min petu hi kan zah lo va, "Lalpa, nangin hun min pe a, nangmah biak aia biak tur dang hi ka ngah lutuk a, i tan chuan ni khatah darkar khat pawh ka hmang dawn lo va, ka be hman ve lo che a ni e," kan ti a ni. Kar khatah ni sarih a awm a, chawlhniah kan hnathawh kan chawlhsan ve a, Pathian Biak Inah lawmthu sawi turin kan kal duh chuang lo va, chuti chung chuan Pathian biak ina kal thinte chu kan hmusit zui lehngal a. Chutiang mite chuan Kohhran thurin chauh kan kalh lo va, Pathian thurin kan kalh tlat a ni. Inkhawm ngai reng reng lote hi ka theih tak emaw tiin kan chapo duh phian zawk a, kan inngaihtlawm theih nan Pathian biak a t'ul a ni.



■ *Miin i dik lohna an sawi chuan insiam that nan hmang la, dawta i chanchin an sawi erawh chuan nuhsan mai rawh.*

— Epictetus

■ *I beisei loh chuan, i beiseina piah lama thil awm chu i hmu ngai lo vang.*

— St. Clement of Alexandra

Ka duh lai... 'MANGTHA' KA TI PHAL LO CHE...

— *Upa H. Lalchhandama*
Bungkawn

Hmangaih leh hmangaih inthen tluka thil lungchhiatthlak hi a vâng awm mang e. Mi tam takin an hmangaih takte an kalsan tawh thin a, an hmangaihthe pawhin an kalsan châng a awm bawk.

Min hmangaih em emtu leh, kei pawhin ka hmangaih leh duh em em chu ka then a lo tul ta si! Keimah ang bawkin mi tam takin an lo then tawh bawk a. Thenkhat chuan an then hnu hi an hre zui vak lova, thenkhat erawh chuan an ngaihven zui reng thungin ka ring.

Kan inthenhain thla pawh a liam hmain mi thenkhat chuan, "I hmangaih leh duh tak chu i then a lo tul ta si a, i lung a leng awm mang e, i khua a har awm mang e" min titu ka tawng nual mai. Ni e, zep thu a cheng lo, ka lung a leng a, ka ngai a, ka khua a har a ni. A chanchinah hian sawi tur ka ngah, ka tana a thatna hi ka sawi seng mawlh lo a ni ber.

Amah nena kan inzuina pawh kum 22 hmel hmu a lo ni ta a, chuti teh thuta ka han then chu patling mah ni ila, mittui a hnai hial mai. Mahse, ka intipachang a, mittui em chu sen ka tum lo. Ka lung a tihlen thu erawh ziak talin kan hnutchhiah ve ang e.

Kan intawn tan tirh

He, ka hmangaih leh duh tak nena kan intawn tan tirh hi ka mitthlaah hian a cham reng thin. Amah nena kan intawn tan ni chu 1995 September thla tawp lam a ni a, khami tuma ka hlimzia leh lawmzia kha sawi thiam ni ila, ngaihnaawm taka sawi tham a tling ang. Mahse, kan intawntirha ka lawmzia kha ka tawngkam thiamna hian a sawi chhuak thiam ngang si lo, mahse, ka hlim a ni tih chu min hriatpui tih ka hria.

Kan intawn tirh atangin kan inzui nghal chawt a, ka rilru tam zawk ka pe ti ila, ka daw tamin ka ring lo. Kei mi mawl tak leh chak lo tak hi ani hian kawng hrang hrangin min kaihrui a, kum 22 hmel hmu kan inzui chhunga amah avanga ka chan leh ka tawn hi ka ziak seng mawlh lo. Ka tana a tangkaina hi tlem kan han tarlang teh ang.

* Amah avang hian thenrual tam tak ka neih phah.

- * Amah avangin ka tawn phak ngai loh tur ka tawng.
- * Amah avangin ka neih phak hauh loh tur - chanvo, nihna, eizawna leh thil tha tam tak ka neih phah.
- * Amah avangin ka hriat ngaih hauh loh tur ka hriat phah.
- * Ani hian ka nih phak hauh loh tur min nihtir.
- * Ani hi ka kal phak ngai lohna tur - Mizoram hmun hrang hrang bakah, state pawn leh leh India ram pawn thlenga min hruai thlentu a ni.
- * Ani hian ka din phak hauh lohna turah min dintir.
- * Ani hi ka chak lohnaa min dawnkangtu a ni.
- * Min fuih a, min hrilh a, min tanpui a, min zirtir a, kawng min kawhmuhtu a ni.
- * Ka zahzumna zualpui pawh min tihrehsak.
- * Sawi tur a tam, ka sawi seng mawlh lo a ni ber mai....

Ka hlimna leh thatna tur min duhsaktu a ni.

Thalai ka nih avangin ka tan a rilru a seng nasa em em a, a chang chuan ka hlim loh hlauin hun hlimawm takte min siamsak fo a, a chang chuan Pathian thute min hrilh thin. A chang chuan Pathian faka zai thatzia min hrilhin, keimah ngei

pawh min zaipui thin a. A huhova zai ngaina anih avangin ka thiante nen min ko khawm a, zaipawlte min dinsak bawk. A chang chuan veng chung chauha hun ka hmang chu duh taw lo vin hmun dangah te min chhuahvahpui ve thin a, veng dangah te min hruaiin a chang chuan hmun hla takah te pawh min hruai thin. A bula ka kal hi chuan nuam ka ti a, ka hlim thin a ni. Tin, thalai ka nih avangin taksa insawizawi ka mamawh tih a hria a, field-ah te min inkhelhpui chang a awm a, a chang leh min tlanpui dawr dawr chang a awm bawk. A chang chuan zing taka min rawn kai tho a, a changin zan rei tak thleng min menpui thung. A chang chuan nilengin hun min hmanpui thin a, a chang chuan zanriahte pawh kan kil dun hial thin a ni.

A mizia leh rilru puthmang:

Ka tana a tangkaina leh a hlutna lamah ka lo luangliam ta mah mah a, ka tana a hlut zual chhan ber, a mizia leh a rilru put hmang lam ka la sawi lo. Ani hi chu mi tumruh tak mai, midangte ngaih sak em emtu a ni a. Midangte tana hun pe ral thak duh khawpa mi thatna tur duhtu a ni. Hetiang hian a mizia

leh a rilru put hmang i han sawi teh ang.

Krista hi a dah chungnung hle a, Isua Krista rinna leh amah anna kawnga thalaite hruai tum tlattu a ni. Kohhran ngai pawimawh em emtu a ni a, Kohhran kut ke ni tura a thalaipuite buatsaih tumtu a ni a, chu mai ni lovin, Kohhran hnathawh tipuitling turin thalaite a fuih reng thin baw. Tin, chu mai a la ni lo, Krista Chanchin Tha puandarh hi a ngai pawimawh em em a, hemi kawngah hian nasa takin thalaite a fuih reng baw a ni. Heng zawng zawng bakah hian Krista'n a siam chhan ber chu rawngbawl na hi a ni tih a hria a, Krista'n a chhandam chhan pawh rawngbawl na hi ni bera a hriat avangin hei hi a thupui ber a ni baw. Thlarau bo a veizia te, Missionary a ngaihsakzia te, ramthar lam rawngbawl na a ngaih pawimawh zia te, Krista la ring lotute a veizia mawlhte hi sawi thui ava chakawm tak em!

A miziaa ropui ka tih em em pakhat chu - mi hausa leh rethei, mi fing leh mi mawl, mi lian leh mi t  a thliar miah lo hi a ni a, tluk loh rim a nam hle mai! Tin, sum leh paiah a duham ngai lova, a neih ang chhun chhun erawh a hmang tangkai thiam

hle. Tul lovah a suma khawhral ngai lova, a intodelh em em thinna te hi a entawntlakna pakhat chu a ni baw.

Mi chanhaite a ngaihsak

He, ka hmangaih em em rilru put hmanga tha ka tih em em dang leh chu - taksa leh thlarauva riangvai leh chanhai a ngaihsak em em mai hi a ni.

Tisa lama mi chanhai, rethei leh damlote a kanin a tanpui thin a, khawhar lusunte a r l fo thin a, an pual hian a tanngtai fo thin baw. Tin, damlo tan thisen vawi tam tak a pe a, natna thibaiawm, HIV+ leh ruihhlo ngaite thleng hian a ngaihsak em em a, chu mai a ni lo, heng mite tan hian sum tam tak pawh zuk seng hreh lo a!! A va tiropui thin tak em ve aw!

Heng bakah hian thlarau lama mi chanhai, Krista hlata awm thin te hi a vei em em a. An pual hian Camping-te buatsaihina a tlawhchhuak fo thin a, an inahte lengin inkhawm turte hian a sawm fo thin a, heng hi a mizia bet tlat a nih avangin ka ngaisang a, ka hmangaihna tizualtu pawh a ni.

Kan hun hnukung

Ka duh lai, ka hmangaih em em hian kan inthen hun chu a la

awm dawn tih min hrilh fo thin a, kei chuan hre reng mah ila, ka ngaihtuah ngam ngai thin lo. Mahse kan lo inthen tak si-ah chuan ani nena kan hun hman dun tam tak ka thlir kir a, ka lung a leng thar hle mai. Mahse, chung kan sulhnu ka chhui kirte chu amah ka ngaihna tizualtu leh ka lung tileng zualtu mai a ni si.

Ka tana a inpekna a ropuizia leh ka tana a thiltih tam ziate ka ngaihtuah lai hian, atan hian thil ropui tak ka ti ve lo a ni tih ka hriat avang erawh chuan ka zak chem chem a, ka inthlahrung thin. Mahse, a tlai zo ta... Tunah chuan kan in mangtha a lo ngai ta si. Ka duh lai.. mangtha ka ti phal lo che asin; mahse...

Sawi tur a tam, sawi sen a ni lo e. Ka hmangaih leh ka duh em em, mangtha ka tih phal loh chu tu dang ni lovin, **KRISTIAN THALAI PAWL** ngei hi a lo ni e.

Engkim tan hun ruat a awm

Thuhriltu chuan engkim tana hun ruat a awm thu a sawi a. Pian hun leh thih hun a awm thu te, phun hun leh thil phun phawi hun a awm thute a lo sawi a ni (*Thuh 3:1-2ff*).

He thu hian ka rilru min hnem hle. Kum 1995-ah KṚP-ah phunin ka awm a, 2017-ah chuan KṚP aṅga phawiin ka

awm ta a, phawia ka awm kumah chiah hian mi tam tak chu KṚP-ah phunin an lo awm ve thung a, chung zingah chuan ka fapa ngei pawh KṚP-ah phun tan a lo ni ve ta thung a ni.

Fak hla siamtu chuan...

"Hringmi hun tui luang ang a liam zel e, Kir zai reng rel lovin a her liam zel" (KHB 555);

"Hun hian lui lian luang zel angin, Hringfa a len bo fo" (KHB 26) a lo ti a. Kan hun hi tui luang angin a liam zel a, chu hun chuan hringmi min len bo zel a, min la len bo zel dawn bawka ni! He hun, tui luang anga liam zeltu hian kan duh emaw, duh lo emaw, KṚP aṅga chauh ni lovin, he khawvel aṅga ngei pawh hian min la len bo dawn a ni tih ka chianga. Tin, keimah chauh ni lovin, khawvel mi zawng zawng hi len bovin kan la awm dawn.

Chuvangin, hun tha kan neih lai hian khawvel lama tlan mai mai lovin LALPA duh zawng i ti ang u, kan that lai hun a rei dawn si lo. Kan that lai hian theih tawp chhuahin LALPA leh A kohhran tan i inhmang zel ang u, tih hi KṚP member-te hnena ka thuchah hnuhnung ni teh se.

KṚP vul zel rawh se.

KṚP, mangtha le.

HE KUM THAR HI I TAN MALSAWMNA NI RAWH SE

– H. Zonunsanga
Kolasib Venglai Branch

Rum 2017 Kum thar mawi êm êm mai, sâng tam tak tena an hmuh phâk loh chu dam taka hmang thleng thei turin kan nunna rahbi Siamtuin min tukthar sak leh ta, he kum tharah hian nun thar nei si lovin Calendar thar leh Pro. Pic/DP. thar chauh pho chhuak chungin Lal lungawi kum hun kan nghâk leh tawp ang tih erawh hlauhawm tak a ni. Mihringin thutiam la a, kan hun kal tawh chhe lai siamṭha a, hma thar thlîra suangtuahna famkim nêñ kan hun bul inṭanna a ni a, dawnsawn dân erawh thiam kan thiam viau a ngai âwm e.

Nikum lama kan hmingchhiatna nawhrehna hun ṭha inherchhuak hi

tlûkna ngaihan kan tlûkpui leh a nih vaih chuan pachhe kumtiam chu kan tân liau liauva buatsaih a ni mai. Kum kalta kha han thlîr kîr vang vang la, nangmahah khan eng lai nge siamṭhat mamawh, chu siamṭhat tur dawhthlêng chu pho chhuak la, mite changkân rual leh tih theih ruala ti ve thei lova i inhriat tlatna nangmaha thinlung ser lian tak awm kha hlip thla rawh le, mi ruala kallo hnungtawlh an nihna khawvelah hian ngil takin i hma lam hun thlir la, i duhthusam tipuitling turin suangtuahna vulh len ngawt a tawk lo, phak tawka chet chhuah ngamna leh beih hram hram ngamna nun zel hi a lo ni zawk.

Mi la hmuh ngai loh ni thar hmuh vanga lo khauphâr thawven ve ngawt ṭhin ka ni em, ruahmanna them te pawh siam ngam lo chung a hlawhchham tura ni tin delhhlum sa ei tura kaihthawh ngai ka ni em? A bul ṭan ṭhat chu a zahve zo ang a ni tih thumal tawite hian kan nunah

sei takin thu sawi thung se la, hlawhchham tura piang ka ni bik lo tih hi mahni zawn ðheuhva darthlalang hung chungin inbihnawn nan i hmang ang u. Vai mistiri iptea sum tam tak luanglut ðhin hi branded thawmhnaw inbel chung hian kan thlir liam leh ngawt mai dawn em ni, a ngalria zawk tih theih ang tih tum lova nalh lama rualel pha chung a hawisang ngawt hi changkanna suak a ni tih i pawm ngam ang u. Bike manto tak chung a chuang chung a hnathawh thawmhnaw hak hlauhna hri hmanga ni tin inveng lawk turin kan insawm a, Nu leh Pa te thawhchhuah hmanga inchhekarbawm ve ngawt kan ni em, Pa te aia hahdam tum ðhalai sa ðha pui pui hmel hmuh hi hmuhnawm a tling lo, intodelh tuma mahni tâ ring ngam te hmel hian mi thinlungah thu tam tak a sawi zawk ðhin. Thawh chhuah nei ve dek deka, thil manto awh leh ngawt ðhin te pawh hi rual elna dik lo a ni tih i pawm ngam ang u, a khâwl lam aia a hmang chhuak tam

changkan zawkna hi avang viau lo maw, chuti chung a changkanna Title kan inpe leh ngawt ðhin hi chu felhlel a awmin, thuam tharin he Kum tharah hian kan inthuam a ngai.

Changkang kan intihna zâwn hi hnungtawlh inñanna a ni zawk thei tih hre chungin chumi ke chheh her rem tur chuan nang leh kei hi kum thar, ni thar hmanga din thar kan ni.

Nikum lama thle kawi mai mai ðhin ten rinna thlai chi kuiñiahna hun remchangah hmang thung ila, Pachhe kumtiam tia chhuahchhal kan tawh fo loh nan nu leh paten fate tana entawn tlak khawpa tum fel tak neih kumah puang ila, Nupa inkar fello ten hmangaihna puntir kumah puang ila, dawrkai leh sumdawng ten dik leh thianghlim taka sum lakluh kumah puang bawk ila, Kohhran leh pawl hrang hranga hruaituten member hla hnuhhnaih kawnga ðhahnem inngaihsiak

kumah puang bawk ila,
Sorkar hnathawk ten
mirethei thleng phak
hnathawh kumah puang ila,
veng leh veng inhmelmak
th̄in ten remna chibai inbuk
kum atana puang thei turin
mi tin te i pen chhuak ang
u le.

Chhiartu zawng zawngte he,
K - Kumbul ni thar duhawm
leh thianghlim,
U - Up beh rual loh ni eng
mawi tak,

M - Mi tam tak tena an hmuh
phak loh,
T - Thleng thei tura i nunna
thuruk vawn him a ni bik hi,
H- Hringchan chhunga i
vanneih ni atan pawm la,
A - Aram leh felna zawn
hmasak kuma puang chungin
R- Rorelna dik, rinawmna chi
th̄a kuiñiak rawh le.

Kumthar hi i tana
malsawmna dawn kum, in
thutiam a hlawhtlin kum lo ni
mawlh rawh se.



Lawm thu sawi teh

- * *I duh zawng i neih vek loh avangin lawm thu sawi teh. Lo nei ta vek la, dam chhan i la nei dawn em ni?*
- * *Hriat loh i neih avangin lawm thu sawi teh, chu chuan thil thar zir turin remchang a siam si che a.*
- * *Harsatna i tawh th̄in avangin lawm thu sawi teh, chu chuan a tiñhang lian che si a.*
- * *Ifamkim loh avangin lawm thu sawi teh, mahni inzir zel tura remchang siamtu che a ni si a.*
- * *I tihsual th̄in avangin lawm thu sawi teh, zirlai ropui tak zirtirtu che a ni si a.*
- * *I chauh th̄in vang leh i ngui th̄in vangin lawm thu sawi teh, nangmaha danglamna thlentü che a ni si a.*
- * *Nun tam nei th̄inte chu an hlawhtlinnaah chauh ni lo, an hlawhchhamnaah pawha lawm thu sawi thei mite hi an ni.*
- * *Vanduinia nia i hriat i tawh chang pawhin lawm thu sawi teh, i tan malsawmna hlu ber a ni thei si a.*

— Ericson J. Holmes

DAVIDA – ‘SI’ SAWM LEH PANGA KAI

– Hrángluaia
Ṭhuampui

A hmél a ṭha si

(1 Samu. 16:12; 18; 17:42)
Davida hi hmél ṭha chhungkua aṭanga lo zichhuak, sar veng vawng, mit meng mawi tak, hmél ṭha tak a ni. A hmél a ṭha satliah mai pawh a ni lo, a hmél a hlimin a nung a. En tawh pawha en leh tul chi; en mai pawha mi naran chunglam mi tih hriat theih, hmél zahawm, hruaitu hmél leh pa ber chan chang thei hmél pu mi a ni.

Hla phuah a thiam si

(2 Samu. 23:1) Hmun khawhara beram veng ṭhin a nih angin khawharna leh lunglennaten a chím reng a. Chu chuan amaha talent awm chu kaithovin a hmang ṭangkai a, Sâm bu zatve lai mai hi a lo phuah theih phah ta a ni. Israel sakhaw biakna hla phuah chhuaktu a ni a, an

hnam hla kungpui nih a tling a, a hla phuahte kaltlang hian mi tam takin Pathian an hmuh phahin, an chawimawi phah a ni.

Rimawi tum a thiam si

(1 Samu. 16:18; 23) Hla phuah a thiam chauh ni lovin zai a thiam a, rimawi tum a thiam baw. Israel-te zinga rimawi tum thiam ber pakhatna niin, Lal Saula kawchunga ramhuai hnawh chhuahna atan a hmang a. Lungngaite hnemtu, chak lote tichaktu a ni.

Rál do a thiam si

(1 Samu. 16:18; 17:49) Thlaler sikulah bawk virvawm leh tiang hman dan a zir thiam. Mi huaisen, ralrel thiam leh ṭuan rang tak (hmun leh hmuna Saulan feia a khawh pawh khan pen khatin a kian hman) a ni. Chumi hmang chuan a berante a venghim a. Chumi hmang vek chuan Pathian beram Israel-te a venghim baw. A hun chhungin an hmélma zawng zawngte a ke hnuaiah a dah thei a ni.

Mi inngaitlawm tak a ni si

(1 Samu. 17:58; 26:20; Sam 5:7) Israel sipaite ngam loh Goliatha thattu ni mah sela Lal Saula hmaah inngaitlawm takin, "I chhiahlawh Jesaia fapa ka ni," tiin a inhmelhriattir a. Lal atana hriak thih ni tawh mah sela, lal tlawm tur Saula hmaah, "Israel lal chu uihli lek zawng turin a kal chhuak a nih hi," a ti thei bawk.

Lal chi a ni si

(Gen. 49:8-12; Mt. 1:1-6; Lk. 3:31-34) Jakoba fapa upa ber Reubena chuan a pa hmei a mutpui avangin ro luahtu nihna a chan a. Fa lai Juda chungah a tla a. Juda pawh chuan a monu Tamari lakah fa (sáwn) a neih avangin amah leh a thlah chhuan sawm thlengin lalna chang lo tura hrem an ni a. Tichuan, chhuan sawm leh pakhatnaah Davida a lal thei ta chauh a nih kha. Lal chi a nih vang leh Pathian belruat a nih vangin Davida chu a lal a. Juda thlah lal hmasa ber a ni a. Israel lal ropui ber

a ni a. Lal Isua thlahtu lal langsar ber a ni bawk.

Hriak thih dawng hnem ber a ni si

(1 Samu. 16:12,13; 2 Samu. 2:4; 5:1-3) A beram veng lai ko hawngin Samuelan Israel lal atan hriak a thih a. Judaten an lal atan hriak an thih leh a. Israelte pawhin an lal atan hriak an thih leh a. Israel lalte zingah lal atana hriak thih dawng hnem ber a ni.

Thusawi a thiam si

(1 Samu. 16:18) Davida chu mi fing, thu leh hla lama talent dawng aha tak mai a ni a. Thusawi a thiam hle, thu dik leh belhchian dawl sawi mi a ni a. Ngaihnaawm tak leh awihawm taka sawi thiam mi - khabe mistiri niin, thusawinung - mi hneh theihna nei mi a ni.

A hausa si

(1 Chro. 22:14, 16; 29:2-4, 28) In leh lo chu sawi lovah lum se. Rangkachak, tangkarua, lungflu, sailungvar, dar leh thir a nei tam em em a. Tunlai rate-a

chhut chuan USA ram khu a lei thei var var a ni. Israel lalte chauh ni lovin khawvêla lal hausa ber record a tling.

A rilru zawng zawnga thil ti mi a ni si

(1 Chro. 13:8; 2 Samu. 18:33) A thil tih tawh vekah chuan a rilru zaah za a pe a. Sùm then nei lovin a inleih baw fai vek thin. Ral a do chuan a rilru leh theihna zawng zawngin a do va. Hla a phuah pawhin chuti bawk. A lawm pawhin nupuite zahpuiawm khawpin a lam mai a. A lungchhiat pawhin mi dangte mitmei veng miah lovin a tap leh hawm hawm mai bawk a. Hei hian rilru sawrbing mi leh finchilh mi a nihzia a lantir a. A hlawhtlinpui thin.

Pathian thinlung ang pu mi a ni si

(1 Samu. 13:14; 16:6-12; Tirh. 13:22) A thinlung a thianghlim a. Hmangaihna leh lainatnain a khat. Amah thah tuma veh fotu Saula a thungrul duh lo va. Amah anchhia lawhtu Nabala leh Simeia a ngaidam a. Amah

thah tumtu a fapa hmelfha nunrawng Absaloma meuh pawh a ngaidam a, a thih aia thih a thlang. Lal Isua mi sualte aiawha a thih tur hlimthla leh a thupêk, "I hmelma hmangaih rawh," tih chu a takin a lo nunpui daih tawh a ni.

Zawlnei a ni si

(Sam 16:10; 22:18; 41:9; 69:21; Tirh. 2:30) Davida chu lal chauh ni lovin zawlnei a ni bawk. Lal Isua tuarna lam thute a lo hrilh lawk tam hle. Heng a hrilh lawknate hi hlain a puang chhuak a, a thleng dik zel a ni.

Mesia lalram entirtu a ni si

(Amosa 9:11; Ezek. 34:24; Jer. 23:5; Is. 22:22; Thup. 22:16; 3:7; 5:5) A fapa Solomona thil tihsual vangin a tupa Rehoboama hunah Israel ram ropui a phel a. Hun hnuhnung lamah pheih chuan an ram ata ram tinah hnawh darh vek an ni a. Chumi hnu lamah chuan Davida lalram chu an ngai em em a. Mesia lalram thar beiseina lian tak an neih phah a. Chu chu Lal

Isua Kristaah a takin a lo thleng ta a ni.

Sual sim duhna thinlung nei mi a ni si

(2 Samu. 12:13; 1 Chro. 21:8; Sam 51) Lal Saula thil tihsual Zawlnei Samuelan a puan khan sim ahnehin a inluling deuh deuh zawk kha a ni a. Lal Davida erawh chu a sualna Zawlneiin a puan veleh thinlung keh chhian a sual a sim a. Pathian hnenah thupha a chawin ghah thin a. Tichuan, Pathianin a ngaidam a, a chhandam hlimna a pe leh a, Thlarau tihnuamin a chelh reng thin a ni.

A hnenah Pathian a awm si

(1 Samu. 16:18; Sam 89:20-22) Davida chuan Pathian a thin

a, a thu a awih a. Ralrel a thiam a, hmelma zawng zawng a tu tlawm a. Israel ram a zauh va, hnam inpumkhatna a vawng h a, thlamuang tak leh hnianghnar takin a chawm a. Kiriath-Jearim khuaa Pathian bawm a la a, Zion tlanga Biakbukah a dah a. Biakbuka Pathian biak dan fel zawk duang chhuakin fakna hla a phuahte hmangin Pathian an pawla thinlung takin an chawimawi thei ta. Israel-te chuan Davida hming hi an ngaisangin an zah em em a, chuvang chuan tu mahin 'Davida' tih hming hi an sain an pu ngam thak lo. Heti taka mi bik a nih theihna chhan chu a hnenah Pathian a awm vang a ni.



SAWMNA

Darlung Kristian Thalai Pawl chuan ni 21-23.2.2017 chhung hian KṚP Diamond Jubilee kan lawm dawn a. Darlung Kohhrana lo lawi tawh, hmun danga awm zawng zawngte chu Jubilee min hmanpui ngei tur hian kan sawm a che u.

Secretary
Diamond Jubilee Celebration Committee
KṚP, Darlung Branch

KṚP ROREL INKHAWM PROGRAMME

A hmun : Bawngkawn Kohhran Biak In

A hun : March 3-5, 2017

March ni 3, 2017 (Zirtawpni)

6:30 - 7:00 p.m. : Zai ho

7:00 p.m. PALAI LAWM LEH REPORT INKHAWM

Chairman : T.Upa Ngurhmingliana, A/L
Kumpuan thupui leh film hlanna

Hlantu : Rev. Lalramliana Pachuau,
Sr. Executive Secretary

Reports : 1. General Secretary report
2. Finance Secretary report
3. Bial reports khaikhawmna

Zaipawl : 1. Mizoram Synod Choir
2. Bethlehem Venglai Bial

March ni 4, 2017 (Inrinni)

9:30a.m. - 4:00 p.m. : ROREL INKHAWM

Chairman : Rev. Zothansanga, Leader

March ni 4, 2017 (Inrinni)

6:30 - 7:00 pm : Zai ho

7:00 pm : PATHIAN BIAK INKHAWM

Chairman : Pu K. Lalruatpuia,
Committee Member

Thuhriltu : Pu Vanlalpeka, Finance Secretary

Zaipawl : 1. Mizoram Synod Choir
2. Luangmual Bial
3. Lungdai Bial
4. Zuangtui Bial

March ni 4, 2017 (Inrinni)

Zan inkhawm ban : **FELLOWSHIP**

- Chairman : TUpa Lalrinawma,
Committee Member
- Thupui : Secularism & Christianity
- Sawitu : Nl. Lalfamkimi,
Committee Member
- Item : 1. Acapella - Bungkawn Bial
2. Instrumental Music
- Ramhlun North Bial
3. Short Play - Muallungthu Bial
4. Group Singing - Himali Bial

March ni 5, 2017 (Pathianni)

9:30 - 10:00 am : Zai ho

10:00 am

PATHIAN BIAK INKHAWM

- Chairman : Tv. Joseph Lalsangzuala,
Committee Member
- Thuhriltu : Rev. B. Sangthanga,
Executive Secretary, KTP
- Zaipawl : 1. Mizoram Synod Choir
2. Venghlui Bial
3. Sairang Bial
4. Bawngkawn Kohhran
5. Presbyterian Choir, Lunglei

March ni 5, 2017 (Pathianni)

1:00 - 1:30 pm : Zaiho

1:30 pm

PATHIAN BIAK INKHAWM

- Chairman : Pu Lalchhuanliana,
Committee Member
- Thuhriltu : Upa Zonunmawia,
General Secretary

- Zaipawl : 1. Mizoram Synod Choir
2. Airfield Vengthar Bial
3. Sesawng Bial
4. Lengpui Bial

March ni 5, 2017 (Pathianni)

Dar 6:30 - 7:00 pm : Zai ho

7:00 pm

PATHIAN BIAK INKHAWM

- Chairman : Pu Zonunsanga Ralte, Treasurer
Thuhriltu : Rev. Zothansanga, Leader
Zaipawl : 1. Mizoram Synod Choir
2. Bawngkawn Bethel Bial
3. Reiek Bial
4. Presbyterian Choir, Lunglei

March ni 5, 2017 (Pathianni)

**Zan Inkhawm ban
FELLOWSHIP**

- Chairman : TUpa H. Ramnunsanga,
Committee Member
Item : 1. Musical Play - Mission Veng Bial
2. Live Band - Chanmari Bial
3. Faklam - Venghnuai Bial
4. Solo - Thingsulthliah Bial

NOTE :

1. Zai hruai hi a thlengtu kutah dah a ni.
2. Sound system hi a thlengtu kutah dah a ni.
3. Pathianni chawhma leh zan inkhawmah thilpek lak khawm a ni ang.
4. Fellowship hunah hian a tam thei ang ber zaiho na neih a ni ang.

KṚP Rorel Inkhawm hi Kristian Ṭhalai chanchinbu man la pe lo zawng zawngten pekna hun remchang atan i hmang ang u.

LAL ISUA HI KAN TA A NI

- Rinfela Zadeng Zobawk Vengthlang Branch

Johana 3:16 - "*Pathianin khawvel a hmangaih em em a, chutichuan a fapa mal neihchhun a pe a, amah chu tupawh a ring apiang an boral loh a, chatuana nunna an neih zawkna'n.*"

Bible chang kan tarlan khi Internet a Pathian thu zawn hlawh ber a ni e an ti a. A pawimawh in a hlu em em a, Kristian zawng zawng chuan he thu hi kan hre vek awm e. Lal Isua hi keimahni tan liau liau a lo kal a nih zia hi kan hriat nawn fo a ÷ul awm e. Misual, kebai, mitdel, rukru leh Pastor emaw pawh ni ila, Lal Isua hi kan ta a ni tho tho a, kan hnaih poh leh kan ta a nihzia a chiang ÷hin.

He khawvela alo kal dawn pawh khan, damdawi in changkang leh ÷ha kha a thlang duh lo a, ranchaw pekna thlang a lo thlang a nih kha. A chhan chu mi zawng zawng- mi rethei leh mi hausa te tan pawh a biak phak Pathian, engkim kan dil ngam leh kan duh duh kan thlen ngamna Pathian anih vang a ni.

Khawchhak mifingte pawh khan an hai a, Heroda in a a pian an ring a, an lut nulh anih kha. Mahse Lal Isua hi keini mi chhe te te, misual leh ÷awmkai lo te tan a lo kal a nih avangin hmun tlawm tak hi kan tan a lo thlang a ni.

Tin, Mosia hun lai a ÷anga thu leh awmla a den hlum nghal tur,- Hmeichhe Uire lai tak an lo hruai a nih kha. Tun lai hun phei chu nise a mualpho in, WhatsApp leh Facebook ah kan vawrh darh nasa in mi zawng zawngin tuibur hmuamda lek ah a uire thu kan hre nghal vek ngei ang a, a thlakak phei chu en ngam ani lovang.

Pharisai leh lehkhaziaktute pawh khan Mosia dan, Pathianin a pek hmang a tihlum nghal tur a nih avangin Lal Isua bulah an lo hruai a nih kha. Mahse Lal Isua chuan, Misual ber, thi nghal tur pawh chu ngaidamin, tisual nawn lo turin a chah a nih kha. Lalpa chu fakin awm rawh se! Kan sualna leh kan bawhchhiatna te chu khawvel mite hriat leh nung tlaklo tur khawp a rawng pawh ni se, Lal Isua ah chuan ngaihdam kan ni tawh a, sim a Lal Isua zui mai kha a ni kan tih ve tur. Hei hian Lal Isua chu kan

tan ngei a lo kal a ni tih chiang takin a entir a ni.

Tin, Chhiahkhawntu Zakaia, mipuite'n an huat leh an ngei ruk em em, a eiru ni ngei a an ngaih inah khan Lal Isua khan chaw a ei tlat mai! Tunlai khawvel ang chu nise mipui te hian Zakaia chet dan hi RTI Act emaw, CBI emawin finfiah an duh mai thei a ni. Chuti khawpa khawtlanga tuitla lo leh an ngei em em ina Lal Isuan chaw a ei kha an hre thiam lo hle a nih kha. Mahse, hei hian a entir chu- Lal Isua hi keini misual, mite pawhin min hnualsuat leh min entleu te tan ngei hian chatuan nun min pe turin a lo kal a ni tih a lang chiang hle. Zakaia anga Lal Isua hmuh duh a theipui kunga lawn duhna rilru kan put phawt chuan Lal Isua hian kan nunah lo thlen a, hlim taka chaw ei a duh reng a ni.

Tin, Judate'n an ten em em leh an hmuhsit ber hnam Samari hnam ngei kha Lal Isua chuan tehkhin thu ah hmangin mite tanpuitu leh mite tana thiltha titu a nih thu kan hmu a. Mite tan a thiltha tih kan sawi dawn apiang in Samari mi hi kan sawi chhuak ta ziah a nih hi. Khawvelin midangte tana thiltha a tih pawhin Samari mi

hming chawiin- Samiratan, Samiratan Project *adt* kan ti ta zel anih hi. Khawvel leh Kristiante zinga hnam lar bel pawl an ni hial ang ti ila kan sawi sual awm love.

He hnam ber kher Lal Isua'n tehkhin thu a a hman chhan hi engdang vang nilovin chitin hnamtin tan a lo kal a nihzia min hriattir a, min zirtir a duh vang a ni. Brahmins (Hindu hnam sang ber) kan ni emaw, Dalits (Hindu hnam chhe ber) kan ni emaw, Lal Isua hi kan ta vek a ni a, Pathian chuan kan tan, angkhat vekin min pe a ni.

Misual thi tur, khawvelin a ngaihdam theihloh pawh ni ila, Kalvari tlang Kraws dinglam a an khenbeh misual thi tur pawh ngaidam tu Lal Isua hi kan ta a ni tih i hre nawn fo ang u. Beidawanna, manganna, harsatna leh suahsualna thuk ber pawhin min nangin min chimbuai mah se, Lal Isua hian damna min pe a, thlamuanna min pe in kan sual min ngaidam a ni. Lal Isua hi kan tan chauh a lo kal a ni a, midang tan a lo kal a nilo tih i hre thar ang u.

Isima, i pan a, i beisei phawt chuan Lal Isua hian Vanrama i thutna tur kengin a lo pan che.

Work Camp Report :

Khulichera

RUAHMANNA : Keini Aizawl Branch KTP, Venghlu chuan 2016 a kan Branch Project tur uluk taka kan ngaihtuah hnuin kum 2016 chhung ngeia Work Camp neih tha a ti a. A remchan dan anga sum te tuakin, Budget-ah dah a ni a. Synod Office (SMB) lam te va dawrin kan Budget nena inmil tawt tur si Work Camp neih tulna hmun kan zirchian hnuah Manikbond Pastor Biala Khulichera hmunah Biak In ceiling siam leh bang rawng hna wih hnathawh tur chu thlan fel a ni a. Aizawl Branch hi ni 3 February 2007 a indang chauh kan ni a, Work Camp kan neih hmasak ber tur a ni barok a, memberte pawh kan phur tlang hle. Work Camp kan neih hun tur atan hian November ni 1 (thawhle hni) a tanga ni 7 (thawhtanni) chu kan ruat fel a.

KAN FEH CHHUAK TA : November ni 1, 2016 (thawhle hni) zingkarah Kohhran nu leh paten min thlah a, kan Kohhran Secretary, Upa Dr. F. Lalthmingsanga'n tawngtainain Pathian hnenah min kawltir a, zing dar 6:35 ah kan chhuak. Work Camp-ah hian member 23 (Mipa -15, Hmeichhia -8) kan kal a ni. Kan tlan vang vang hnuah zan dar 9:00 velah Pastor

thuthmun Manikbond thlen hma deuhva kea kal tanna tur peng kan thleng a. Evangelist T.v. Lalnelawma (N. Vanlaiphai) hovin kohhran mipuiin, naupangte nen min lo hmuak a. Kan hnathawhna tur hi eng pawh lut lo, kea km 4 zet kal ngai a ni a, bungrua kan ngahin Generator nen kan thawt chhuak rup mai si a, Kohhran mipuite khan min lo hmuak lo sela chuan kan thleng thei ngut ang emaw chu! Darkar chanve vel kan kal hnuah Langkaih lui lian zet mai chu lawnglengin kan kan a. A kal chak lo leh chau apiang inchhawm zelin zan dar 11:00 pelh hretah kan thleng ta hlawl mai a. Kohhran hovin ei min lo siamsak thlap a, hahdam takin kan mu ta a ni.

HNA KAN THAWK : Nilaini (Nov. ni 2) atangin mipa lamin celing siam hna kan tan a, hmeichhe lamin tile rawng an lo hna wih barok a, kan phurin kan hlim tlang hle. Sum hmahruai thawn hmasain hmanraw mamawh tur engkim hi kohhran mipuiten an lo lam khatom sa vek a ni. Ni 4 chhung hnathawhna hun kan nei tih inhre rengin zawh hman ngei kan tum a, zing dar 7-ah hna kan tan chat thin a ni. Kohhran mipuiten min tawiawm reng a, eirawngbawh thlengin min pui a, Inrinni chawhnu dar 2:30-ah kan hna kan zo fel thei a ni. Lalpa rawngbawh kan

ni tih inhre reng chung a hna kan han thawk meuh chu tuman chauh/hah reng kan sawi lo. Hna kan thawh chhungin Evangelist leh Bialtu Pastor, Pastor Vanlalliana Sonset leh Pro. Pastor Lalngaihawma ten min vil tha hle a, a thlamuanthlak hle. Zan lamah Inkhawm kan nei thin a, keini lamin thusawi leh Zai pawl kan nei thin a, anni Kohhran lam atang pawhin Special item: Naupang zai pawl leh chhungkaw zai (Family Choir) te kan ngaithla a, Pathian fakho a nuam hle. Pathianni chawhmaah Pastor-in Lalpa Zanriah Sacrament a theh a, Pathianni tlaiah phei chuan kohhran mipui zawng zawng nen ruai ropui kan theh ho a ni.

KOHRAN DINHMUN : Khulichera Kohhran hi Branch Church (estd. 2015) a ni a, chhungkua 11 awmin danzawhkim 38 an awm a, kohhran mi zawng zawng hi 60 an ni. Evangelist Tv. Lalngaihawma'n thahnemngai takin Pathian Chanchin Tha a hril thin tih a lang reng a. Chutih rualin kohhran pawl dang an awm thluah bawka a, thahnemngaih a na duh hle. Chaworai hnam an ni a, kan tazong pawh a la inhnaih hle. An hnampui, thisena inthawi an la tam hle a, tazongtaipui an ngai hle a ni.

A NGHAWNG : A tak taka ramthar rawngbawlna han hmuh

meuh chu rilru a harhthar uai uai mai. Ram lak tur a la tamzia te, missionary-ten an beih nasatzia te, thawhlawm thawh bakah ringhartan tazongtaipui an mamawhzia te mit ngeiin kan hmu a. Haw dawn zana member kalten kan thawmhnaw leh mutbu kohhran mipuite hnena kan sem darh sang sang lai hmuh phei chuan a takin Pathianin kan thinlungah hna a thawk nghal tih a lang reng a, a hmuh a nuam ngei mai. 'Kristan ram lak a thulh thei si lo va, kei pawhin a aia nasain ka bei ang' tih rilru pu hmel KTP member-tea hmuh theiha a lang chhuak chu ropui tak a ni. Kan inchiir lo chiang kher mai.

HAW KAWNG : Thawhtanni (Nov. ni 7) zing dar 6:00-ah haw turin kan chhuaka. Kohhran mipui zawng zawng tih mai tur hian min thlah a, kan bungrua a rit rit min kensaka, ruah tla chiah chiah hnuaia kan kal bauh bauh hnuaia zing zar 7:30-ah kawngpui kan thleng a. Pastor-in tazongtainain min thlah a. Kohhran mipuite nen kan inchi bai sap sap a, van nuama inhmuh leh beisei ran chungin Khulichera Kohhran mite nen chuan kan in mangtha ta a ni.

– Lalhlimpua

Secretary

Aizawl Branch KTP

HRISELNA ■■■

ANTIBIOTICS

Damdawi zingah hian anti biotics tih hming hi kan hriat lar berte zing ami a ni awm e. Antibiotics hi chi hrang hrang tam tak a awm a, damdawi kan hman mekte zingah hian natna enkawlna atana ƣangkai ber zing ami a ni. Antibiotics chungchang hi tawite, hriat thiam awlsam thei ang turin tarlan i han tum teh ang.

Anti (kalh/do) leh biotics (thilnung) tih thu belhbawm antibiotics tih awmzia chu kan taksaa natna thlentu, nunna nei, natna hrik dotu tihna a ni a. Kan taksaa natna thlen thei natna hrik, mit lawnga hmuh theih loh, nunna nei ve si hi chi hrang hrang - bacteria, virus, fungi, amoeba, protozoa te an ni a. Hetiang natna thlen theitute hnathawh doletna atan hian damdawi ƣangkai tak antimicrobial agent hman ƣhin a ni a, antibiotic chu antimicrobial agents zing ami, bacteria avanga natna thlentu enkawlna atana hman ƣhin a ni.

Kum 1900 chho bawr vel, khawvel pum ang pawha damdawi thiamna a la hniam ve

hle lai leh natna enkawlna lam an beih nasat em em lai khan 1928-ah British scientist, natna hrik bacteria zirbingnaa mithiam (bacteriologist) Sir Alexander Flemming-a chuan London damdawiin pakhata a hnathawhna (laboratory)-ah natna hrik chanchin a zir mek laiin bacteria hrik a ƣotirna petridish (darthlalang thleng dar tẽ)-ah chuan thil hmuar leh bäl a hmu tel a. A hnathawh tichhetu ngeiawm tak anga a ngaih laiin chu thil hmuar chu a han zirchian nak chuan a bul velah natna hrik, bacteria ƣo an lo awm reng reng lo tih a hmuchhuak ta a. Chu thil hmuar (mould) chu thil nung ve tho *Penicilium notatum* (Penicillin) a ni a, hei hian ngaihtuahna thar pein, natna hrik dang pawh a that thei tih a hmuhchhuak ta zel a. Hun a lo kal zel a, kum 1941-ah chuan mihring natna enkawlna atana hman theih turin sawngbawl a ni a, a hunlai a natna ƣihbaiawm tak takte chu enkawl dam theih a lo ni ta a ni. Damdawi anga siam a nih hnuah Penicillin chu thil mak tiin 'miracle penicillin' tiin a hming an vuah hial a. Indopui 2-na a lo ni chho bawk nen, indonaa hliam sipai tam tak nunna chhantu a ni a, khawvel

hmun hrang hrangah hman a niin khawvela antibiotic hmasa ber chu tun thleng hian a la hlu em em reng a, antibiotic chi thar hmuhchhuah tumin damdawi company lian ten an la bei chhonzawn ta zel a ni.

ENG VANGIN NGE KAN HMAN?

Mihringte hi kan velah hian natna hrik (bacteria)-te hian min hual vel reng a. Kan boruak hip luhah te, kan ka leh hnar, vun leh kan kawchhung, kan rilah te pawh bacteria hi an awm reng a. Kan taksa ral do khawl (immunological system) hian heng lak aṅang hian min veng reng ṭhin a; mahse, ven theih loh chin a neih hunah bacteria-te chuan kan taksa remchang lai apiang aṅangin natna min thlen ta ṭhin a ni. Chutiang bacteria avanga natna chi hrang hrang tam tak - mitna (conjunctivitis) aṅanga thihna hial thlen thei pneumonia, septicemia te damdawi ṭha em em chu antibiotics hi a ni a. Mihring natna azirin antibiotic hman tur bik a awm hran ṭheuh a, tin damlo pakhatah antibiotics pakhat aia tam a hman a ngai fo ṭhin bawk. Antibiotics hi a tlangpuiin a eia ei chi a ni a, damlo serious deuhah chuan

inchiu a ngai bawk ṭhin. Tin vuna hnawih chi te, mit leh beng a thlawr chi te pawh a awm bawk.

ENGTIN NGE HNA A THAWH?

A damdawi azirin antibiotics-te hian chi hnihin hna an thawk ṭhin a, bacteria te chu thatin (bactericidal) emaw an inthlahpung zel tur titawpa taksa ral dotuin a tihchhiat mai theih tura hnathawh (bacteriostatic)-te a ni.

TAKSAA A HNATHAWH

Antibiotics-te hian natna (infection) tlanglawn hi chu ni reilote chhungin an tidam tlangpui a. Natna lanchhuah dan (symptoms) hi vawi khatah an tihreh nghal mai ṭhin loh avangin na chhawkna ei tel a ngai fo ṭhin a ni. A natna kha dam tawh anga a lan hnua h pawh doctor chawh ang thlapin a course kimin ei ngei ngei tur a ni a, chuti lo chuan natna (infection) awm leh theihna a sang em em a, tin antibiotic kha a hnua h taksa a natna hrik that thei tawh lo (antibiotic resistant)-in a siam thei a, a pawh em em ṭhin a ni.

Damlo na serious lem lo leh damdawi-ina awm ngai lova in

lama antibiotics nena in enkawl hovah hian a hman dan tur dik taka hman chuan side effect hlauhawm hi a tam lo viau a, kawthalo leh luakchhuak te hi side effect tlangpui chu an ni mai. Amaherawhchu mi thenkhat chuan antibiotic allergy an nei thin a, hei hian pawithui tak a thlen thei thung; fimkhur viau a tha.

FIMKHUR NGAIHNA TURTE

Hospital chhunga damlo enkawl na atana hun reilote chhunga hman antibiotics ho pawh hi a tlangpui in damlo tam zawkah chuan an him em em a. Penicillin group (Amoxicillin, Ampicillin, etc.) leh Cephalosporins (Cefaclor, Cephalexin, Cefoperazone, etc.) teah hian fimkhur a ngai zual a. Damloteah damdawi allergy avangin thak, hrawk, hmai leh hmui vung a thlen phah thei. Hetiang a thleng a nih chuan damlo enkawltute a rang thei ang bera hrilh tur a ni a, allergy thlentu damdawi group ami ho reng reng chu hman tawh loh tur a ni.

Penicillin allergy nei nasa, hre hmasa si loa hman phei chuan nikhaw hre loin a awm der theih a, allergy test neih

hmasak phawt tur a ni a. Hun kal tawh lamah antibiotics allergy nei chuan doctor hnenah hrilh ngei ngei bawt tur a ni.

Antibiotics tam zawk hi kal (kidney) kaltlangin taksa a tangin a inpaih chhuak thin a, hei vang hian kal tha lo neiah chuan fimkhur leh zual a ngai thin bawk.

ANTIBIOTIC RESISTANCE

Antibiotic hmasa ber Penicillin hman a nih a tangin kum zabi chanve chuang lai mai antibiotics chi hrang hrangte chu mihring natna tihdamna atana hmanraw tangkai ber pakhat an ni a, antibiotics hman pawh a ni telin a nasa telh telh bawt a ni. Hetia natna tam zawk thlentu bacteria-te antibiotics hmanga taksa hmathawk thei loa siam a nih thin lai hian nghawng tha lo a nei ve leh zel a, chu chu Antibiotic Resistance hi a ni. Bacteria-te hi thil nung ve bawt, mihringte anga inthlah pung thei, din khawchhuahna atana insiam danglam thei an ni a. Hei vang hian antibiotics-in tihchhiat vek tuma a beih lai in bacteria-te chuan dam khawchhuahna kawng an lo zawng ve a, anmahni lo insiam danglam in (mutation) emaw,

antibiotics tichhe theitu enzyme lo pechhuakin an dam khawchhuahna an lodapve thin a.

Hei vang hian bacteria tam tak chu antibiotics an lo hmachhawn tawh ten an tichhiat theih tawh loh, antibiotic resistant strain-ah an lo insiam thin ta a. Chutiang antibiotic resistant bacteria ho chu inthlahpung leh bacteria dangteah inkai chhawng ve zelin antibiotics hman kha damloah hna thawk thei miah lovin a awm theih phah ta thin a.

Antibiotic resistance awm chhan hi damloin rei tak antibiotics a hman vangte, course kim lo leh mumal lo, duhdah taka antibiotics ei thin avangte, a hmanna tur ni loa antibiotics hman a nih thin vang te a ni a. Chuvang chuan damdawi chawhtu doctor thiam tak takte chu an fimkhurin natna thlentuk dik tak bacteria kha zawng chhuakin, chumi mil chuan antibiotics treatment an kalpui thin a ni. Antibiotics ei reng rengin a course kim leh doctor chawh ang thlapa ei thin tur a ni a, doctor chawh ni loin ei reng reng loh tur a ni. Hetiang thil thleng hi damlo enkawl naah paw i thui tak a neih theih avangin mi thiamten an buaipui

nasa a, fimkhur lo taka antibiotics-te hi hman a nih chuan kum reilote chungin natna (bacterial infection) tam tak hi enkawl dam hleih theih loh a ni thei a, resistance avang hian tun dinhmunah pawh TB damdawi atan chuan antibiotics chi li lai ei a ngai a nih hi! Khawvel puma hriselna lam ngaihtuatu pawl lian ber WHO chuan kum 2015 November ni 16-22 kha khawvel puma antibiotics resistance chungchang inhrilhhriatna hapta World Antibiotics Awareness Week-ah a hman a, India ramah pawh Indian Pharmaceutical Association bultumin hemi kar vek hi Antibiotics hman chungchang inzirtina hun atan hman gin thupui ah pawh 'Responsible Use of Antibiotics Saves Lives' tih a hman a. Keini Mizote pawhin hemi kawngah hian kan khaw hawi tizau ila, mi tu pawhin uluk leh fimkhur takin antibiotic hi i hman g theuh ang u.

Drug Information Centre
Department of Pharmacy,
RIPANS Zerbawk, Aizawl 796017.
SMS: 8730955168
Email: dicipans@gmail.com



KANTU

Lunglei Bazar Veng Br.



Lunglei Bazar Veng Branch KṚP hi Lunglei West Presbytery huam chhunga Bazar Veng Bial, Bial Station an ni a. Bazar Veng Branch KṚP hi February ni 22, 1989 khan din a ni a, kum 2014 khan Silver Jubilee hmel a hmu ve a, tun dinhmunah hian member 105 (Mipa 61, Hmeichhia 44) an ni.

Branch tihchak nan Group 2-ah an inṭhen ṭhin a, Group te hian Budget nei ṭhinin, Branch chakna hnar ber an ni a; tin, Nilai zan, Inrinni zan, Pathianni chawhnu leh Pathianni zanaḥ te inkhawm tam lamah Group inelna an nei ṭhin. Tin, Thawḥṭan zan inkhawm bikah hian ṭan dar rik hma minute 15 la awmah kal hma an inchhiar ṭhin.

Branch KṚP hnuaiah hian Sub-Committee hrang hrang heng - Programme,

Evangelical Cell, Banner & Decoration, Reception & Ushering te din a ni. Thawḥṭan zan inkhawm hi Sermon, Ṭawngṭai Rual, Kum puan Thupui zir leh Hla zir nan te an hmang ṭhin a, Pathianni chawhnu inkhawm banah Fellowship an nei ṭhin a, hetah hian Group Inelna te, Hla Zir, Zai ho, Sharing leh Programme nuam tak takte an hmang ṭhin.

Branch hmingin chanchinbu 'Kohhran Entu' an chhuah ṭhin a, CKṚP chanchinbu Kristian Ṭhalai hi copy 40 an la mek, KṚP member aṭang hian Pastor 1 a chhuak tawh a, tun dinhmunah hian Branch hmingin missionary 1 an chawm ve mek bawk a ni.

Member HSLC leh a chung lama hlawḥṭlinna changte lawmpuina thuziak an pe ṭhin a, member damlo

damdawiina lut an awmin kannna thilpek Rs 500/- an pe thin a, KṚP member boral an awm chuan Kuangah Pangpar dahin, Rs 1,000/- in an ral thin.

Faith Promise, Inkhawm thawhlawm leh Group Budget te hi an sum hmuhna hnar ber a ni a, Member-te tihphur nan Bial Pawn tlawh, Sports, Branch Nite te an hmang thin.

Kum 2017 Project atan Keyboard, Bench 10 siam leh John Williams Hospital a tanpuina pek te an nei a,

tihlawhtling turin chak takin ke an pen chho mek a, an phur hle.

Central leh Bial atanga tih tur awmte an hlenchhuak ve thei zel a. Tin, Kohhran zaipawl hi KṚP kutah a awm a, hla zir leh hla rem an taima a, Kohhran Programme ah leh hunpui pawimawhah chuan zaipawl an nei thei zel a. Branch Member te an inpawh tlang a, an inlungual a, KṚP activities ah a tam thei ang ber an che chhuak zel thei te hi an lawmna ber a ni.



SYNOD CHOIR RAWNGBAWLNA

1. **DURTLANG KOHHRAN BIAK IN** : December 6&11, 2016 khan Synod Inkharompui vawi 93-na, Durtlang Kohhran Biak Ina nghahah an zai a, vawi 1 dinah hla 1 ve ve an rem.
2. **HMUNTHAR BRANCH** : December 16, 2016 khan Hmunthar Branch KṚP silver jubilee lawmnaah vawi 1 dinah hla 2 an rem. Director Pu K. Lalruatpuia leh Upa Rosangliana-ten an tawiawm.
3. **DISTRICT JAIL** : December 26, 2016 khan District Jail, Armed Veng, Aizawlah Synod Moderator Rev. Lalzuithanga tawiawmin an kal a, vawi 2 dinah hla 4 an rem. Chawhma leh chawhnu inkharom bakah Fellowship hun an hmang a, Lalremsiami, K. Lalremruati, R. Zomuanpuui leh Lalremsanga-te an solo a, Zoramtanan instrumental music a tum bawk. District Jail hi rawngbawla chhuah tum 31-na a ni.

Keimahni



■ **LAWNGTLAI** : December 1-5, 2016 chhung khan Lairam Isua Krista Baptist Kohhran (LIKBK) Kristian Ṭhalai Pawl Inkhawmpui wawi 18-na, LIKBK Biak In, College Venga neih hmanpuiin T.Upa Ngurhmingliana (Asst. Leader) leh Pu F. Lalremruata-te Lawngtlaiah an kal a. December 3 (Inrinni) chawhma inkhawmah T.Upa Ngurhmingliana chibai bukna thu a sawi a, Pu F. Lalremruatan CKṬP hmingin thilpek a hlan a, tlaiah ruai an ṭheh.

■ **HMUNTHAR BRANCH** : December 16, 2016 khan Hmunthar Branch KṬP Silver Jubilee lawmna hmanpuiin Rev. Zothansanga (Leader) a kal a, thuchah sawiin jubilee lawmpuina thilpek a hlan.

■ **HLIAPPUI BRANCH** : January 6-8, 2017 khan Hliappui Branch Diamond Jubilee lawmna hmanpuiin T.Upa Zomuana Ralte leh Dr. David C. Vanlalfakawma-te an kal a. Jubilee thupui "Sal tangte chhuahna thu" (Lk. 4:18-19) tih chu Jubilee ni, Jan 7, 2017 Inrinni chhun inkhawmah T.Upa Zomuanan a sawi a, Dr. David C. Vanlalfakawman jubilee monument a hawng a, Pathianni chawhnu inkhawmah thuchah a sawi bawk. Pathianni zan inkhawm ban fellowship-ah T.Upa Zomuanan jubilee thilpek a hlan.

■ **ECM KṬP NENA INPALAI TAWN** : Evangelical Church of Maraland Ṭhalai Pawlten inkhawmpuia inpalai tawn an rawtna, Synod Officers Meeting (OM)-a kan thlen, OM-in Synod Executive Committee (SEC)-a min thlensak leh chu SEC 264:15 chuan, Conference-a inpalai tawn chu a ṭha e, tiin a rel.

■ **SYNOD INKHAWMPUI PALAI RUAT** : Synod 2015:68-in SEC 258:12 thu, Synod Inkhawmpuia Kohhran Hmeichhia leh KṬP palai tur zat tihchian chungchang a rel, Synod Inkhawmpuia Kohhran Hmeichhia leh Kristian Ṭhalai Pawl

aiawh pahnih ve ve intirh thin rem a tih angin, Synod Inkhawmpui vawi 93-na, 2016-a KṚP aiawh palai tur pahnih inruat tura tih kan ni a. Office Bearer-te inrawnin palai atan Pu P.C. Biakmuanpuia (Asst. Secretary) leh Pu Zonunsanga Ralte (Treasurer)-te ruat an ni.

■ **NL. P.C. LALHMACHHUANI RALNA HLAN :** October 29, 2016-a Upper Republic Branch KṚP-ten ramthar zin puala Lawipu-a huan sama an inhlawh tuma vanduinaw tawk ta NL. P.C. Lalhmachhuani chhungte hnenah December 13, 2016 khan CKṚP hminga ralna ₹ 1,500/- hlan a ni a. A ralnaah hian T.Upa Ngurhmingliana (Asst. Leader), Pu Zonunsanga Ralte (Treasurer), Pu Lalchhuanliana leh Pu Lalmuanawma-te an kal. Upper Republic Branch inhlawhnaa hliam tuar Tv. Joss Zonunsanga chu October 30, 2016 khan dam lo kanna ₹ 1,000 pek a ni tawh baw. Hemi chungchangah hian KṚP, Upper Republic Branch Secretary aṅging lawm thu sawina lehkha kan dawng.

■ **SERCHHIP JOINT KṚP DIN THU HRIATTIRNA :** Serchhipin kum 2020 KṚP General Conference an thlen tur inbuatsaihna atan November 4, 2016 khan Serchhip Joint KṚP din a nih thu leh an hruaitu ruatte hriattirna kan dawng.

■ **HOSPITAL CHARITY HLAN :** December 20, 2016 khan Hospital Charity atana sum lut ₹ 66,933/- chu Synod Hospital-ah (Fraser's Clinic kaltlangin) hlan a ni a, hlan tawh ₹ 4,52,463 nen hlan tawh zawng zawng ₹ 5,19,369/- a ni. Tunah hian lo lut thar, la hlan loh ₹ 2,230/- a la awm.

■ **UPA ATANA THLAN:** December 4, 2016 khan Tual Upa Zomuana chu Ramhlun Kohhran Upa atan thlan a ni.

■ **BRANCH DING THAR REPORT:**

1. **Reiek Pastor Bial** chhungah November 6, 2016 khan KṚP, West Lungdar Hmar Veng Branch din a ni a, member mipa 31, hmeichhia 14, an vaiin 45 an nih thu report kan dawng a, registration fee ₹ 50/- an pe baw.

2. **Luangmual Pastor Bial** chhungah December 3, 2016 khan KṚP, Chawlhmun North Branch din a ni a, member mipa 84, hmeichhia 65, an vaiin 149 an nih thu report kan dawng a, registration fee ₹ 50/- an pe baw.



Kantu: Lunglei Bazar Veng Branch

CENTRAL K.T.P. HRUAITUTE, 2016-2018

Office Bearers

Leader	:	Rev. Zothansanga	9436365426
Asst. Leader	:	T. Upa Ngurhmingiana	9436374104
Gen. Secretary	:	Upa Zonunmawia	9436152024
Asst. Secretary	:	Pu P.C. Biakmuanpuia	9436374833
Treasurer	:	Pu Zonunsanga Ralte	9402113038
Fin. Secretary	:	Pu Vanlalpeka	9436153728

Committee Members

Tv. Joseph Lalsangzuala	9436152063	Pu Lalchuanliana	9862364583
Pu K. Lalruatpuia	9862577177	T.Upa Lalrinawma	9436152297
Pu Lalhnehzova	8119947974	Pu F. Lalremruata	9862561961
T.Upa H. Ramnunsanga	9436152320	T.Upa Zomuana Ralte	8794722319
Nl. Lalfamkimi	9436365245	T.Upa P.C. Lalropuia	9863144485
Upa Rosangliana	9612166769	Pu Lalmuanawma	9436196515
Dr. Lalrotluanga	9436153937	T.Upa Ridky Lalammawia Ralte	9862387308
Dr. David C. Vanlalpakawma	9436156561	Tv. Robert Lalduhzuala	9862368012
T.Upa Lalmuanpuia	9436142398		

Ex-Officio Members

Rev. Lalzuithanga	-	Synod Moderator
Rev. Lianhmingthanga Sailo	-	Synod Secretary (Sr.)
Rev. B. Sangthanga	-	Executive Secretary, i/e KTP

Postal Regn. no. MZR/81/2015-2017
RNI No. MIZMIZ/2009/29074



PATHIAN
NENA
LEN
DUN

Printed and Published by Zonunmawia, Synod Office, Mission Veng on behalf of Kristian Thalai Fellowship
Edited by Lalchuanliana and printed at Synod Press, Mission Veng, Aizawl, Mizoram. Copies – 41,000